



**JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIAL**

*Komunikadu Imprensa*

*Periodu: Setembru, 2010*

*Edisaun: 15 Setembru, 2010*

**Tribunál Distritál Suai halo julgamentu ba kazu Violaasaun Seksual**

Iha loron 08 Fulan Setembru 2010, Tribunál Distritál Suai hala'ó julgamentu ba kazu violaasaun seksual ne'ebé mak komete husi arguidu DJ hasoru labarik minoridade ho inisial VJ. Kazu ne'e rejistu iha tribunál ho numeru prosesu 140/TDS/2009. Kazu refere akontese iha areia Sub Distrito Zumalai, Distrito Covalima.

Prosesu julgamentu ba kazu refere derije husi Juiz koletivu Dr. Jose Maria de Araujo, no akompaña husi Dr. João Raposo (Juiz Internacional), Dr. Alvaro Maria Freitas Juiz Estájiariu. Enkuantu husi parte Ministériu Públiku representa husi Dra. Zelia Trindade, no arguidu rasik hetan assistensia legal husi Dr. Marçal Mascarinhas husi Defensoria Públika no Dra. Lorena dos Santos husi LBH Covalima no Oficial Justisa Sr. Acaçio Ribeiro.

Diretór Ezekutivu JSMP, Luis de Oliveira Sampaio haktuir katak, *kazu ne'ebé akontese iha uma laran entre Avo hasoru fali beioan ne'e nudar hahalok krime ne'ebé seriu teb-tebes. Tanbá ne'e aktu kontra lei kontra mos obrigasaun sosial nu'udar membru familia atu proteze membru familia seluk husi violensia ka forma amiasa sira seluk. Aleinde ne'e, aktu ne'e hamate futuru lezada nian tanbá simu todan psikolojiku no trauma ba tempu naruk nia laran.*

*Tanbá ne'e, nia hatutan katak aktu ne'e mos manifesta pratika ne'ebé la respeita ema seluk nia dignidade umana, nune'e bainhira tribunál prova duni katak arguidu nia hahalok ne'e, tribunal tenke hamonu desizaun reflata faktu hirak ne'ebé produz iha prosesu julgamentu laran hodi fo kastigu ne'ebé ekuilibru ho nia hahalok.*

Bazea ba akuzasaun husi Ministériu Públiku ne'ebé le'e husi Juiz hateten katak, iha loron 13 Fulan Agosto 2009, iha Sub Distrito Zumalai, Distrito Covalima, arguidu ho inisial DJ komete krimi violaasaun seksual hasoru lezada VJ ne'ebé hanesan arguidu nia beioan rasik . Tuir fontes informasaun ne'ebé hetan iha prosesu julgamentu katak, arguidu aproveita tempu bainhira ninia feriak oan sai husi uma depois nia ba lezada nia uma hodi pratika aktu violaasaun seksual refere ba lezada.

Refere ba prosesu julgamentu iha tribunál bainhira halo tiha identifikasaun ba arguidu, iha oportunidade ida ne'e mos arguidu deklará ba tribunál katak, akuzasaun ne'ebé mak Ministériu Públiku hato'o ba nia, ne'e nia rekuñese katak nia mak halo duni iha tempu ne'eba hasoru nia beioan rasik. Iha parte seluk lezada mos hateten katak, arguidu ne'e nia avó mane rasik.

Aleinde hare ba relasaun familiar, nune'e iha sirkunstansia seluk maka hanesan lezada ho idade ne'ebé kiik no la merese atu hasoru aktu hanesan ne'e.

Testemuña IM iha ninia depoimentu mos haktuir katak, los duni iha momentu ne'e aktu refere akontese duni bainhira lezada toba dukur hela depois rona lezada hakilar maka testemuña halai mai tenta atu hapara problema ne'e.

Relasiona ba faktus ne'ebé iha, Ministeriu Públiku akuza Arguidu DJ ho krime Violasaun Seksual ho artigu 173 alinea *a* no *d* Kódigu Penál Timor Leste. Nune'e mos iha sirkunstansia ne'ebé hatodan arguidu maka regula iha artigu 52 pontu i) Kódigu Penál Timor Leste, tambá arguidu prátika violasaun seksual hasoru ema ne'ebé iha relasaun familia ho nia.

Tuir observasaun JSMP iha prosesu julgamentu ba kazu ne'e hatudu katak, faktus hirak ne'ebé produz iha prosesu julgamentu laran hanesan rejultadu ezame médiku no deklarasaun lezada rasik, depoimentu husi testemuña, nomos husi arguidu nia konfesa katak, nia maka komete hahalok hasoru nia beioan. Tambá ne'e JSMP husu ba tribunál kompetente hodi tetu didiak faktus hirak ne'e, no hamonu desizaun ne'ebé justu no adekuada nune'e bele refleta duni hahalok arguidu nian

Atu hetan informasaun kompleitu kontaktu:

Luis de Oliveira Sampaio

Direitór Ezekutivu JSMP

Diresaun Email: [luis@jsmp.minihub.org](mailto:luis@jsmp.minihub.org)

Landline: 3323883